

金

史

七

志第四

金史二十三

開府儀同三司柱國錄軍國重事尚書右丞相修 國史領經筵事都總裁臣 脫脫奉
勅修

五行

五行之精氣在天爲五緯在地爲五材在人爲五常及五
事五緯志諸天文歷代皆然其形質在地性情在人休咎
各以其類爲感應於兩間者歷代又有五行志焉兩漢以
來儒者若夏侯勝之徒專以洪範五行爲學作史者多采
其說凡言某徵之休咎則以其事之得失繫之而配之以
五行謂其盡然其敝不免於傳會謂其不然肅時雨若蒙

恒風若之類箕子蓋嘗言之金世未能一天下天文灾祥
猶有星埜之說五行休咎見於國內者不得他諉乃彙其
史氏所書仍前史法作五行志至於五常五事之感應則
不必泥漢儒爲例云

初金之興平定諸部屢有禎異故世祖每與敵戰嘗以夢
寐卜其勝負烏春兵至蘇速海甸世祖曰予夙昔有異夢
不可親戰若左軍有力戰者當克旣而與肅宗等擊之敵
大敗太祖之生也常有五色雲氣若二千斛困廩之狀屢
見東方遼司天孔致和曰其下當生異人建非常之事天
以象告非人力所能爲也溫都部跋忒畔穆宗遣太祖討

之入辭奏曰昨夕見赤祥往必克遂與跋忒戰殺之穆宗
攻阿疎日辰巳間忽暴雨昏暄雷電環阿疎所居是夕有
巨火聲如雷墜阿疎城中遂攻下之太祖嘗往寧江夢幹
帶之禾場焚頃刻而盡覺而大戚即馳還幹帶已寢疾翌
日不起幹塞伐高麗太祖卧而得夢亟起曰今日捷音必
至乃爲具於毬場以待有二虜渡水而至獲之太祖曰此
休徵也言未既捷書至衆大異之他日軍寧江駐高阜撒
改仰見太祖體如喬松所乘馬如岡阜之大太祖亦視撒
改人馬異常撒改因白所見太祖喜曰此吉兆也即舉酒
酹之曰異日成功當識此地師次唐括帶幹甲之地諸軍

介而立有光起於人足及戈矛上明日至札只水光復如初

收國元年上在寧江州有光正圓自空而墜八月己卯黃龍見空中丁未上候遼軍還至孰結濼有光復見於矛端天輔六年三月師攻西京有火如斗墜其城中是月城降而復叛四月辛卯取之

太宗天會二年曷懶移鹿古水霖雨害稼且爲蝗所食秋泰州潦害稼三年七月錦州野蠶成蠶九月廣寧府進嘉禾四年十月中京進嘉禾六年冬移懶路飢九年七月丙申上御西樓聽政聞咸州所貢白鵲音忽異常

上起視之見東樓外光明中有像巍然高五丈許下有紅雲承之若世所謂佛者乃擎跏修虔久之而沒十年冬移懶曷懶等路飢

熙宗天會十三年五月甘露降於盧州熊岳縣十五年七月辛巳有司進四足雀丙戌夜京師地震

天眷元年夏有龍見於熙州野水凡三日初於水面見一蒼龍良久而沒次日見金龍一爪承一嬰兒兒爲龍所戲略無懼色三日如故又見一人乘白馬紅袍玉帶如少年官狀馬前有六蟾蜍凡三時乃沒郡人競往觀之七月丁酉按出許河溢壞民廬舍三年十二月丁丑地震皇統

元年秋蝗十一月己酉稽古殿火 二年二月熙河路飢
三月辛丑大雪秋燕西東二京河東河北山東汴平州大
熟 三年陝西旱五月丁巳京兆府貢瑞麥七月丙寅太
原進獬豸及瑞麥 四年正月乙丑陝西進嘉禾十有二
莖一本七穎十月甲辰地震 五年閏月戊寅大名府進
牛生麟壬辰懷州進嘉禾 七年十一月完顏秉德進三
角牛 九年四月壬申夜大風兩雷電震寢殿鷗尾壞有
火入帝寢燒帷幔上懼徙別殿丁丑有龍鬬于利州榆林
河上大風壞民居官舍十六七木瓦人畜皆飄揚十餘里
死傷者數百同知州事石抹里壓死

海陵天德二年十二月野人採石炭獲異香 貞元二年

五月癸丑南京大內灾 三年十二月己丑兩木冰

正隆二年六月壬辰蝗飛入京師秋中都山東河東蝗

四年十一月庚寅霜附木 五年二月辛未河東陝西地

震鎮戎德順等軍大風壞廬舍民多壓死海陵問司天馬

貴中等曰何爲地震貴中等曰伏陽逼陰所致又問震而

大風何也對曰土失其性則地以震風爲號令人君嚴急

則有烈風及物之災 六年六月壬戌大風壞承天門鵠

尾是歲世宗居貞懿皇后憂在遼陽一日方寢有紅光照

其室及黃龍見於室上又夜有大星流入其邸八月復有

雲氣自西來黃龍見其中人皆見之是時臨潢府聞空中有車馬聲仰視見風雲杳靄神鬼兵甲蔽天自北而南仍有語促行者未幾海陵下詔南征

世宗大定二年閏二月辛卯神龍殿十六位焚延及太和厚德殿三年二月丙申中都以南八路蝗四年三月庚子夜京師地震七月辛丑大風雷雨拔木臨潢府境禾黍穰生嵐州進白兔二八月永興進嘉禾異畝同穎中都南八路蝗飛入京畿十一月辛丑尚書省火是歲有年

五年六月戊子河南府進芝草十三本得於芝田石上薦之太廟六月甲辰大安殿楹產芝其色如玉丙午京師地

震有聲自西北來殷殷如雷地生白毛七月戊申又震十一月癸酉大霧晝晦 七年九月庚辰地震 八年五月甲子北望淀大風雨雹廣十里長六十里六月河決李固渡水入曹州 十年正月鄧州進芝草 十一年六月戊申西南路招討司苙里海水之地雨雹三十餘里小者如鷄卵其一最大廣三尺長丈餘四五日始消 十二年三月庚寅雨土四月旱 十三年正月尚書省奏宛平張孝善有子曰合得大定十二年三月旦以疾死至暮復活云是本良鄉人王建子喜兒而喜兒前三年已死建驗以家事能具道之此蓋假屍還魂擬付王建為子上曰若是則

姦倖小人競生詐僞瀆亂人倫止付孝善八月丁丑策試
進士於闕忠寺夜半忽聞音樂聲起東塔上西達於宮考
官完顏蒲捏李宴等以爲文運始開得賢之兆十四年
八月丁巳朔次乩里舌日午白龍見於御帳之東小港中
旣而乘雷雲而上尾猶曳地良久止去十六年三月戊
申雨豆於臨潢之境其形上銳而赤食之味頗苦五月戊
申南京宮殿火是歲中都河址山東陝西河東遼東等十
路旱蝗十七年七月大雨滹沱盧溝水溢河決白溝
二十年四月己亥大寧宮門火五月丙寅京師地震生黑
白毛七月旱秋河決衛州二十二年五月慶都蝗蝻生

散漫十餘里一夕大風蝗皆不見 二十三年正月辛巳
廣樂園燈山焚延及熙春殿三月乙酉氛埃雨土四月庚
子亦如之五月丁亥雨雹地生白毛 二十四年正月辛
卯朔徐州進芝十有八莖真定進嘉禾二本異畝同穎
二十六年正月庚辰河南府進芝三本秋河決壞衛州城
二十七年四月辛丑京師地微震

章宗大定二十九年五月丁未地生白毛六月曹州河溢
十二月密州進白鷄白雉各一河間府進嘉禾是冬無雪
明昌元年正月懷州河間等處進芝草嘉禾二月地生白
毛六月庚子都水進異舛夏旱七月淫雨傷稼 二年五

月桓撫等州旱秋山東河北旱飢 三年秋綏德好蚘蟲
生旱 四年三月御史中丞董師中奏廼者太白晝見京
師地震址方有赤氣遲明始散天之示象異有以警悟聖
主也上問所言天象何從得之師中曰前監察御史陳元
升得之於一司天長行上曰司天臺官不奏固有罪其以
語人尤非朕欲令自今司天有事而不奏者長行得言之
何如師中曰善五月霖雨命有司祈晴六月河決衛州魏
清滄皆被害是歲河址山東南京陝西諸路大稔邢洛深
冀及河北西路十六謀克之地野蠶成蠶十一月壬午水
冰 五年七月丙戌天壽節先陰雨連日至是開霽有龍

曳尾於殿前雲間是月河決陽武故堤灌封丘而東 六年二月丁丑京師地震大雨雹晝晦大風震應天門右鵠尾壞 六年八月大雨震雹有龍起於渾儀鰲趺臺忽中裂而摧儀什於臺下

承安元年五月自正月不雨至是月雨六月平晉縣民利通家蠶自成綿段長七尺一寸五分闊四尺九寸 二年自正月至四月不雨六月丙午雨雹 四年三月戊午雨雹五月旱 五年五月庚辰地震十月庚子天久陰是日雲色黃而風霾癸卯晨陰霜附木至日入亦如之 泰和二年八月丙申磁州武安縣鼓山石聖臺有大鳥十集於

臺上其羽五色爛然文多赤黃赭冠雞項尾闊而修狀若
鯉魚尾而長高可逾人九子差小侍傍亦高四五尺禽鳥
萬數形色各異或飛或蹲或步或立皆成行列首皆正向
如朝拱然初自東南來勢如連雲聲如殷雷林木震動牧
者驚惶即驅牛擊物以驚之殊不爲動俄有大鳥如鵬鶚
者怒來搏擊之民益恐奔告縣官皆以爲鳳凰也命工圖
上之留二日西北去按視其處糞迹數頃其色各異遺禽
數千累日不能去所食皆巨鯉大者丈餘魚骨蔽地章宗
以其事告宗廟詔中外 三年四月旱十月己亥大風

四年正月壬申陰霧木冰三月丁卯大風毀宣陽門鵠尾

四月旱壬戌萬寧宮端門災十一月丁卯陰水冰凡三日
五年夏旱八年四月甲午兩電河南路蝗六月戊子
飛蝗入京畿八月乙酉有虎至陽春門外駕出射獲之時
又有童謠云易水流汴水流百年易過又休休兩家都好
住前後總成留至貞祐中舉國遷汴

衛紹王大安元年徐沛界黃河清五百餘里幾二年以其
事詔中外臨洮人楊珪上書曰河性本濁而今反清是水
失其性也正猶天動地靜使當動者靜當靜者動則如之
何其爲災異明矣且傳曰黃河清聖人生假使聖人生恐
不在今日又曰黃河清諸侯爲天子正當戒懼以銷災變

而復誇示四方臣所未喻宰相以爲妖言議誅之慮絕言
路即詔大興府鎖還本管十一月丙申平陽地震有聲自
西北來戊戌夜又震自此時復震動浮山縣尤劇城廨民
居圯者十七八死者凡二三千人 二年二月乙酉地大
震有聲殷殷然六月七月至九月晦其震不一十一月京
師民周修武宅前渠內火出高二尺焚其板橋又旬日大
悲閣幡竿下石隙中火出高二三尺人近之即滅凡十餘
日自是都城連夜燔爇二三十處是歲四月山東河北大
旱至六月雨復不止民間斗米至千餘錢 三年二月乙
亥夜大風從西北來發屋折木吹清夷門關折三月戊午